

Te Whare Tākaro

nā Carol Buchanan

Amokura

He Whakatau

Me mātua pānui kia marama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. I hanga whare ngā kōtiro. He aha ngā mea i kohia hei hanga whare?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

E mōhio ana te ākonga ki te hanga whare tākaro? Kōrerotia ngā taputapu e hāngai ana hei hanga whare tākaro. He aha te tikanga o te kupu “whai”?

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tataua i ngā hē), te rere o te reo;
- titiro mēnā e marama ana mā te whai i tētahi o ngā huarahi e whai ake nei:
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapai hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. I aha ngā kōtiro?
2. He aha ngā mea kua whai rātou?
3. Kua whai aha ia kōtiro?
4. Me pēwhea koe e hanga ai i tētahi whare?
5. Ki ou whakaaro, i tū tonu tēnei whare? He aha ai?

Ngā whakautu ki ngā whakapuaki māramatanga

1. I hanga whare rātou.
2. He tūru, he paraikete, he whāriki, he aupuru, he kōpaki moe, he kai, he hoa
3. Ko Tūi i whai i ngā tūru, ngā aupuru, me tētahi hoa. Ko Hana i whai i te paraikete, me te kōpaki moe. Ko Pānia i whai i te whāriki me te kai.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T He tāutu i tētahi raupapatanga.

He whakatakinga ā-roro, he whakaharatau

I mua i te pānui i te pukapuka, matapakia ngā kupu hou kei roto i te pukapuka ki te ākonga.

He aha ngā kupu hou ki a koe? Kōrerotia ngā kupu ki te ākonga. Ka taea e te ākonga te tāutu ngā taputapu mai i ngā pikitia?

Kia oti i te ākonga te pukapuka te pānui, matapakia ngā kupu hou i rongō e te ākonga i roto i te kōrero. Whakamārama hoki ia kupu.

Matapakia me te ākonga ngā tikanga mahi whare tākaro, whare rānei. Whakaatuhia ngā tauri hanga whare ki te ākonga.